

**RECORDATORIO PA YEGA
NA REMARKE PA
TARIFA SPECIAL DI AWA
PA CUNUKERO**



WWW.SOLODIPUEBLO.COM



SOLODIPUEBLO@GMAIL.COM


Despues cu e ex-minister mes a apela
señalando riba su inocencia,
**CORTE DI HUSTICIA A AUMENTA E
CONDENA DI EX-MINISTER BENNY
SEVINGER NA 4 AÑA DESPUES CU
CORTE DI PROME INSTANCIA A
CONDEN'E NA 1 AÑA**



**E FIN DI SIMAN AKI TA E
DI CUATER EDICION DI
PLAYA FILM FESTIVAL**



**POLIS A BAY BUSCA UN
SPIRITO CU A GRITA MEY
ANOCHI DEN CAS NO
HABITA NA BORONCANA**



**NA SERO JANCHI DOS
PERSONA DETENI COMO
SOSPECHOSO DI LADRONICIA**



Prome Minister Evelyn Wever-Croes: Despues cu e ex-minister mes a apela señalando riba su inocencia, **CORTE DI HUSTICIA A AUMENTA E CONDENA DI EX-MINISTER BENNY SEVINGER NA 4 AÑA DESPUES CU CORTE DI PROME INSTANCIA A CONDEN'E NA 1 AÑA**

Na e momento aki tin un persona den Parlamento cu no ta simplemente un sospechoso, pero ta condena pa dos instancia na Aruba

Un otro tema di gran interes cu a wordo trata Dialuna mainta durante e Conferencia di Prensa di Gobierno di Aruba, ta e condena di ex-minister Benny Sevinger.

Diabierna pasa 12 di juli, Corte Comun di Husticia di Aruba a duna su veredicto den e caso Avestruz. E caso Avestruz inicialmente tawata den Corte den Prome Instancia y eyan e ex-minister encarga cu Infraestructura Benny Sevinger a haya 1 aña di castigo. E tempo ey el a dicidi di apela pa asina muestra su inocencia. Awor den apelacion, Corte Comun di Husticia, a aumenta e castigo di 1 aña pa 4 aña.

Prome Minister Evelyn Wever-Croes ta señala cu esaki ta un aumento

considerabel y cu no ta algo comun y p'esey a hala hopi atencion. Durante e veredicto e hues a bisa cu por medio di e sentencia di ex-minister Sevinger e kier duna un señal cla cu corrupcion no ta aceptabel y corrupcion ta conduci na castigonan severo. Esaki ta un bon señal atrobe pa nos tur, cu integridad no ta algo cu por negocia of hunga cu ne.

Prome Minister indica cu na e momento aki tin un persona den Parlamento di Aruba, cu no ta simplemente un sospechoso sino e tin un condena di dos instancia. Legalmente no por forsa ex-minister Sevinger pa sali di Parlamento pasobra un persona cu un condena si por ta den Parlamento sinta. E mandatario ta sigui splica cu si ta trata di

un caso di un minister, si lo ta diferente. E ley nobo cu Parlamentario Edgard Vrolijk y Minister Rocco Tjon a pasa tocante di e screening y integridad ta stipula cu si un minister bira sospechoso, e mester retira inmediatamente.

Prome Minister ta indica cu su partido a pone un standard hopi halto den Parlamento cu nan si no ta traha cu un persona cu ta sospechoso. Si un parlamentario di e coalicion bira sospechoso, e tin cu hala un banda. Na 2021 esaki tawata e motibo cu a baha e gobierno, un parlamentario den coalicion a bira sospechoso, e no kier a baha y Gobierno a muestra cu no kier sigui goberna asina.

“Desde 2017 cu mi a bira minister encarga cu integridad, mi a pone

integridad hopi halto riba lista di prioridad di Gobierno. Nos a bin cu hopi regla, nos a bin cu e instituto Bureau Integriteit Aruba caminda tur hende por meld cosnan cu nan ta mira cu ta un kiebro di integridad y lo wordo atende eyan y nos a percura pa fortifica e liña di husticia pa haci investigacionnan aki tambe.

Papiando den number di mi Partido, nos a duna ehempel tambe cu kiebro di integridad den nos partido tin consecuencia. Mi ta spera cu tur hende por reflexiona riba e veredicto di diabierna, specialmente doñonan di curpa y e partidonan involvi cu ta sostene señor Benny Sevinger den Parlamento. No ta solamente partido AVP, pero tambe partido




MAS, partido Accion 21 y tambe Parlamentario independiente Gerlien Croes ta sostene ex-minister Benny Sevinger den Parlamento. Esaki ta un momento di reflexiona y ohala nan tambe por tuma e momento aki como un reflexion pa asina hunto nos por muestra henter Aruba kico di berdad nos ta pensa di integridad y si nos tur ta riba e mesun liña. Poco poco nos ta yega mas cerca di e meta cu nos kier yega”, Prome Minister a enfatisa.

POLIS Y BOMBERO A BAY PA UN CANDELA BAO AFDAK DI COMPLEHO DI APARTAMENTO NA MEIVELD

Diamars merdia a drenta informe di un cas na candela na Meiveld, mesora a dirigi tanto polis como ambulans na e sitio. Na yegada di e patruya a bin compronde cu aki ta trata di un candela bao di e afdak di un compleho di apartamento y e habitantenan mes a cuminsa combati e candela.

Na yegada di e bomberonan nan a tuma over y a sigui combati e candela te paga esaki por completo. Dos unidad di bombero a presenta na e sitio uno tabata e spuit mes y e otro tabata e tankwagen. Afortunadamente ningun hende a resulta herida durante e combate aki.



DEPARTAMENTO DI EMERGENCIA A BRINDA CUIDO NA 3007 PASHENT

Horacio Oduber Hospital cu cifra di luna di juni 2024


Den cuadro di transparencia y informacion nos di Horacio Oduber Hospital ta comparti cu bos e cifranan pa loke ta luna di juni 2024. Como Hospital ta importante y alabes interesante pa duna comunidad di Aruba un indicacion di cuanto pashent Hospital ta atende mensualmente, cuanto operacion ta tuma luga, pero tambe cuanto baby a nace durante luna di juni, cuanto pashent a regresa cas despues di admision y mas.

Na luna di juni a admiti 867 pashent cual ta mas halto cu na luna di mei (836 pashent) y tambe mas halto cu na luna di april (828 pashent). Di e pashentnan admiti na HOH, e cantidad femenino tabata 473 pashent y solamente

26.4% di e admisionnan tabata planea. E promedio di duracion admiti na HOH na luna di juni tabata 4,3 dia. Na juni ocupacion di cama a bolbe subi pa 94,9% compara cu na luna di mei (83,2%). A haci un total di 558 operacion cu ta poco menos cu na luna di mei (622).

Departamento di Emergencia a atende na luna di juni 3007 pashent cu ta mas pashent cu na luna di mei (2792 pashent) y tambe mas cu na luna di april (2704). Durante luna di juni a yama bon bini na un total di 44 baby mucha homber y 34 baby mucha muhe (total 78 baby). Y na mei Bloedbank Aruba a ricibi un total di 160 donacion di sanger.

Un total di 7127 consulta a ser teni na luna di juni cu



pashent pa specialistanan den servicio di Hospital. Departamento di radiologia a haci un total di 4919 test y tambe 12519 persona a bishita LABHOH na luna di juni. Y por ultimo un total di 838 pashent a regresa nan cas despues di admision na HOH durante luna di juni.

Informacion ta esencial y pues hospital semper t'ey 24/7 via nos website www.arubahospital.com

of diferente pagina di medionan social y claro nos team di profesional semper t'ey pa brinda cuidu di calidad 24 ora pa dia 7 7 dia pa siman.

POLIS A BAY BUSCA UN SPIRITO CU A GRITA MEY ANOCHI DEN CAS NO HABITA NA BORONCANA



Diaranson madruga a drenta informe di cu bisiñanan a scucha gritonan basta fuerte di hende den un cas no habita na Boroncana, mesora a dirigi patruya na e sitio. Na yegada di e patruya a rondia den full e cas no habita aki pero no a encontra cu ningun hende. Pero e bisiñanan ta insisti cu e gritonan tabata sali for di eynan.

Minister Endy Croes:

E AÑA AKI DIA 20 DI AUGUSTUS 2024 TA CELEBRA 75 AÑA DI TRABOU DI BIBLIOTECA NA ARUBA

Minister di Enseñansa y Deporte Endy Croes a reuni cu directora di Biblioteca Nacional Aruba (BNA) Sra. Astrid Britten. Sra. Britten a indica cu Biblioteca Nacional Aruba ta preparando pa celebracion di '75 aña di trabou di biblioteca na Aruba'. Ta "revamp" e logo di Biblioteca Nacional Aruba y lo continua pa pone mas poema riba e glasnán na e edificio na George Madurostraat.

A cuminsa cu poeta clasico y awo ta sigui cu poeta contemporaneo. Di e forma aki ta reconoce e trabou di nos poeta-y escritornan. Lo bin tambe cu un publicacion di e coleccion di arte di

Biblioteca Nacional Aruba. Produccion ta den man di un "curator". Apertura oficial di e prome Sala di Lectura Publico y Biblioteca di Gobierno a tuma luga dia 20 di augustus 1949.

Dia 31 di augustus 1980 Su Mahestad La Reina Beatrix, den presencia di entre otro Diputado di Biblioteca, Sr. Nelson Oduber ta devela un plakkaat na ocasion di ponemnto di prome piedra di e edificio nobo na George Madurostraat. Padvindernan a hisa bandera durante e inauguracion di e edificio di Biblioteca Publico na George Madurostraat na aña 1982.



Dia 3 di maart 1986 Su Excelencia Gobernador di Aruba, Sr. Felipe B. Tromp a batisa Biblioteca Publico Aruba solamente cu e number nobo Biblioteca Nacional Aruba y dia 20 di augustus 2024 lo para keto na '75 di aña trabou di Biblioteca na Aruba'.



21 CURSISTA A RICIBI NAN CERTIFICADO PA E DI SHETE CURSO DI DECLARANT DI ADUANA

Diasabra 6 di juli 2024 a tuma luga un ceremonia y entrega di certificado na un grupo di persona cu exitosamente a finalisa e curso di Declarant di Aduana. Esaki tabata e di shete curso cu Aduana y ATIA a organisa pa brokers y importadornan.

Den presencia di director di Departamento di Aduana, sr. Roderick Croes, director di ATIA, sr. Herrick Henriquez, hoofd di e curso, sr. Marcelito Pablo, secretaria di e curso, sra. Kathleen

Faro, y docentenan, a haci entrega di certificado na 21 persona cu a cuminsa e curso na luna di februari. Di e grupo aki, sr. Henry Cen di e compania Far East Logistics & Transport tabata e mihor graduado. Na segundo lugar tabata sra. Jean-Marie Vos di Ashley Broker y na tercer luga tabata sr. Bryan Werleman di Setar N.V.

Departamento di Aduana y ATIA ta felicita cada un di e cursistanan aki y ta deseanan exito den nan carera.



Minister Endy Croes:

TA TRAHANDO RIBA DIFERENTE ASPECTO PA NOS STUDIANTENAN NA HULANDA

Ta suplica e studiantenan cu ta desea di continua nan estudio na Hulanda pa aplica pa vivienda minimo un año prome.

Recientemente, Minister di Enseñansa y Deporte Endy Croes a elabora riba e situacion di e studiantenan na Hulanda y con ta trahando pa mehora cada aspecto di esaki. E mandatario di Enseñansa a indica cu desde año pasa el a inicia cu un programa specialmente pa e studiantenan cu ta bay Hulanda. A organisa un anochi informativo en conexion cu vivienda pa e alumnonan di examenklas di Colegio Arubano, Colegio Nigel Matthew y Educacion Profesional Intermedio (E.P.I.) na The Movies IMAX na Gloria. Tambe durante e anochi informativo aki, ta informa e alumnonan tocante maneho di presupuesto. Na Aruba tabatin e custumber di aplica pa vivienda na Hulanda algun luna prome. Ta necesario pa e studiantenan aplica minimo un año prome. E mandatario di Enseñansa ta haci peticion na e studiantenan pa e año aki cuminsa aplica pa

vivienda dos año prome. E mandatario di Enseñansa a indica cu tin un website, unda e studiantenan por haya informacion di vivienda na diferente ciudad di Hulanda. Di e forma aki e studiantenan ta bon informa y por aplica trempan pa bin na remarke. Fuera di esaki, Minister Endy Croes a indica cu Nationale Ombudsman Den Haag a produci un rapport hopi amplio di 86 pagina bou di e nomber "Dolor di kabes di studiantenan karibense", unda un total di 624 estudiante a participa den e investigacion aki. A base di e resultado di investigacion a bin dilanti diferente problema cu e studiantenan ta enfrenta durante nan estudio na Hulanda.

Minister Endy Croes a indica cu ta trahando riba e aspectonan aki. Na april ultimo, Minister Endy Croes tabata na Corsou hunto cu Minister President di Corsou

Gilmar 'Pik' Pisas Minister di Enseñansa di Hulanda Robbert Dijkgraaf pa otorga e prome estudiante afo di Hulanda un BSN nummer. Antes a studiantenan tin cu warda alrededor di (6) seis siman pa haya BSN nummer y ta complica nan proceso aya. Desde año 2024 en adelante, e studiantenan di Caribe lo ricibi nan BSN nummer prome cu nan biaha pa Hulanda. Esaki lo wordo coordina y regla via Dienst Uitvoering Onderwijs (DUO). DUO ta den preparacion pa amplia su servicio desde año 2024 pa por brinda e servicio adicional aki. Pues desde año 2024 en adelante, e studiantenan por aplica desde Aruba pa nan BSN nummer y asina por logra biaha cu nan BSN nummer den man, cual lo facilita nan ora nan yega Hulanda. Ademas di esaki, e mandatario di Enseñansa a informa cu directora di Arubahuis Sra. Joselin Croes y Minister Plenipotenciario



na Hulanda Sr. Ady Thijsen a inicia cu un proyecto Ban Topa pa nos studiantenan. E meta di e proyecto aki ta pa topa cu nos studiantenan na Hulanda y scucha nan preocupacionnan.

E problema ta desemboca mas tanto riba e "free movers". Esaki ta e studiantenan cu no a termina scol secundario y a dicidi di bay biba na Hulanda riba nan mes. E mandatario di Enseñansa a indica cu no tin control riba e grupo aki. Banda di esaki, tin contacto cu e mentornan na Hulanda

pa evalua e situacion di nos studiantenan ayanan. A base di e inkietud- y preguntanan cu nan a ricibi di e studiantenan, directora di Arubahuis Sra. Joselin Croes y Minister Plenipotenciario na Hulanda Sr. Ady Thijsen a desaroya un manual (handleiding), unda ta duna instruccion pa guia e studiantenan durante nan estudio na Hulanda. Pues ta trahando pa mehora diferente aspecto pa nos studiantenan na Hulanda. Nos ta sigui traha y percura pa e bienestar di nos studiantenan.

CAMBIA PERSPECTIVA TOCANTE OBESIDAD: SA BO NUMBER Y MIDI BO PESO



Luna di Locura ta bek!

CU CADA COMPRA DI 2 LOTTO 5 RIBA E MESUN TICKET, RICIBI 1 LOTTO 5 ADICIONAL LOCO COMPLETAMENTE GRATIS Ariba e Mesun Ticket!

Aruba – 18 di juli, 2024: Cuminsando awe 18 di juli, e tan gusta Luna di Locura cu Lotto 5 ta bek! Cu cada compra di 2 set di number di Lotto 5 riba e mesun ticket, bo ta ricibi un ticket di Lotto 5 adicional loco completamente gratis ariba e mesun ticket.

Si bo cumpra 4 Lotto 5 riba e mesun ticket bo ta ricibi 2 Lotto 5 adicional loco completamente gratis. Si cumpra bo 6 Lotto 5 riba e mesun ticket bo ta ricibi 3 Lotto 5 adicional loco gratis ariba e mesun ticket. Kiermen mas Lotto

5 bo cumpra riba e mesun ticket, mas Lotto 5 loco bo ta ricibi gratis y asina mas chens bo tin pa gana e jackpot di Lotto 5!

Lotto 5 ta costa solamente 4 florin pa ticket y bo por combina bo 5 numbernan for di 01 te cu 35. Pidi bo rebendedo pa bo 2 set di 5 numbernan riba e mesun ticket y asina bo ta ricibi un Lotto 5 adicional loco completamente gratis. Si bo no sa cua numbernan pa kies, bo ta pidi bo rebendedo pa 2 Lotto 5 loco riba e mesun ticket y ricibi un tercer Lotto 5 adicional

loco completamente gratis. E campaña aki ta valido te cu 31 di augustus. Por cumpra bo weganan di Lotto te cu 7:30PM na bo rebendedo preferi. Sorteo di Lotto 5 ta hunga riba tur diaranson y diasabra anochi pa 7:45PM na TeleAruba pero tambe por wak sorteo di Lotto riba nos pagina di Facebook y YouTube.

Lotto, E Loteria di Aruba tin diferente wega, Catochi, Big 4, 1-OFF, Zodiac, Wega di Number di Korsou di Lotto, Lucky 3, Multi-X, Lotto di Dia, Lotto 5, Mini



Mega y cu su Mega Plus y e diferente weganan di Raspa y Gana y Instacash. Tambe lo por hunga Lotto Online door di bishita: play.lottoaruba.com pa por registra. Cumprando Lotto bo ta contribui na deporte

riba nos isla. E meta ta pa organisa loteria, cambia bida di su hungadonan y na mes momento inverti den deporte local pa medio di donacionnan na e comision di subsidio.

Minister Dangui Oduber

DELEGACION DI ARUBA A REUNI CON EHECUTIVONAN DI ROYAL CARIBBEAN CRUISE LINES

MIAMI, FLORIDA – Diaranzon mainta un delegacion di Aruba cu ta consisti di minister Dangui Oduber, consehero sr. Albert Thielman, CEO di Aruba Tourism Authority sra. Ronella Croes, Chairman di Board di Aruba Ports Authority sr. David Dubero y tambe sr. Mario Arends commercial manager di APA a reuni

cu ehecutivonan di Royal Caribbean Cruise Lines.

Durante e reunion aki Royal Caribbean Cruise Lines a informa cu pa aña 2025 nan ta premira un aumento di cantidad di pasahero cu 20%. Tambe a indica cu nan pasaheronan ta gasta un averahe di \$200 pa dia durante nan bishita na Aruba.



Aruba a presenta e resultadonan di tanto turistanan stayover como resultado di turistanan crucero, tambe tur e inversionan cu ta tumando

lugar.

Minister Oduber tambe a presenta e pa un desaroyo turistico na San Nicolas. Aki minister Oduber a “pitch” un desaroyo

pa un Premier Luxury and Sustainable Cruise Destination na San Nicolas.

Sigur un reunion sumante fructifero.



Parlamentario Marco Berlis (MEP): ARUBA PABIEN CU NOS PROME OMBUDSMAN JURIMA BRYSON

Dialuna 8 di juli 2024 lo keda graba den historia di nos pais, ya cu riba e fecha aki Parlamento 11 di Aruba a vota pa confirma y legalisa e prome Ombudsman di Aruba. Aruba tabata e ultimo pais den Reino Hulandes cu no tabata tin su propio Ombudsman, pero aworaki finalmente esaki a bira un realidad. Tabata tin hopi persona cu tabata cuestiona si enberdad e Ombudsman lo concretisa, sinembargo un biaha mas coalicion den Parlamento a sa di pone su prioridadnan y pone Aruba y pueblo su interesnan prome.

Jurima Bryson: Aruba su prome Ombudsman E comision, cu ta consisti di presidente di Organo Consultativo (Raad van Advies), presidente di Contraloria General

(Algemene Rekenkamer) y presidente di Corte Comun (Gemeenschappelijk Hof van Justitie) a entrega tres number di candidato bon studia y cualifica na Parlamento pa un di nan wordo nombra como e prome Ombudsman di Aruba. Sinembargo despues cu sr. Croes, a retira como candidato di Ombudsman, solamente dos candidato a keda.

Di e forma aki dialuna 8 di juli a yama e reunion publico den Parlamento pa asina vota pa e prome Ombudsman di Aruba. E resultadonan a drenta lihe: 12 voto pa sra. Bryson y 8 voto na favor di sra. Paskel. Di e forma aki sra. Jurima Bryson a keda eligi oficialmente pa Parlamento y a bira e prome Ombudsman di Aruba.

Pabien na sr. mr. Edgard Vrolijk pa finalisa e proceso di e ley di Ombudsman A cuminsa traha riba e ley di Ombudsman na 2005, pero Gabinete Oduber no a logra finalis'e. Siguiendo gobierno a laga e ley drumi den lachi y na 2014-2015 AVP a sigui cu e proceso, pero tampoco no a finalisa esaki pa asina e ley por a finalmente keda trata den Parlamento. Remarkabel ta cu durante 2014-2015 AVP tabata tin 13 asiento den Parlamento pero a dicidi e tempo ey pa pone e ley un biaha mas den lachi y nunca a concretis'e.

Dia 9 di september 2020 Parlamento di Aruba a pasa e ley mes di Ombudsman unanimamente. Dia 24 di februari 2021 Parlamento a cuminsa trata e cambio den nos Constitucion pa

por ancla e Ombudsman aden y dia 10 maart 2022 parlamento a vota pa e ley aki. Lamentablemente solamente MEP y RAIZ a vota pro e ley cu a pone cu esaki a wordo desaproba. Pesey, despues di e reunion aki, sigur mirando e importancia y necesidad di un Ombudsman, sr. mr. Edgard Vrolijk a haci algun cambio den e ley y a presenta esaki na Parlamento. Dia 23 di januari 2023 e cambionan aki a wordo aproba y desde e tempo aki e proceso di nombracion di e prome Ombudsman a cuminsa. Di e forma aki dia 8 di juli 2024 e prome Ombudsman di Aruba a keda formalisa.

Un pabien grandi na nos prome Ombudsman sra. Jurima Bryson, na Aruba y tambe na sr. mr. Edgard Vrolijk pa e logro grandi y




importante aki!

Si pueblo desea mas informacion di e articulo aki, contact mi na tel: 528-4639 of email mi na: marco.berlis@parlamento.aw / Bo parlamentario y sirbidor di pueblo na bo ordo semper!

DAMA CHAUFFEUR A PERDE CONTROL NA E "GREEN CORRIDOR" DILANTI WAYACA FALLS PASA OVER DI E MEDIAN BAY TE OTRO BANDA

Diaranson madruga a drenta informe di un accidente na e "Green Corridor" dilanti di Wayaca Falls, mesora a drigi un patruya na e sitio. Na yegada di e patruya a bin compronde cu aki ta trata di un accidente unda e dama chauffeur di un Hyundai i10 bayendo pariba a perde control subi e median bay te na e otro banda di caminda.

Afortunadamente ningun hende a resulta herida.



MINISTER MADURO DI CULTURA A BISHITA MUSEO Y BIBLIOTECA MONGUI MADURO NA CORSOU

Eynan por haya informacion valioso di e historia di Antiyas y Judaica



Recientemente en conexion cu Dia di Bandera di Corsou, Minister Maduro di Cultura a bishita e Museo y Biblioteca di Mongui Maduro na Landhuis Rooi Catootje. E museo ta duna un bista di e bida di e famianan Huidu Sefardita cu a establece nan mes na Corsou, y ta conecta cu un biblioteca unda tin un coleccion grandi di informacion di Antiyas y Judaica cu sr. Mongui Maduro a colecciona desde cu e tabata tin 14 aña di edad.

Museo

Na e Museo di Mongui Maduro, Minister Maduro a wordo ricibi cordialmente pa sra. Thamara Moreno-Verhuurt, kende a cera e mandatario conoci cu e historia di 4 generacion di e famia Huidu

Sefardita Levy Maduro cu a establece nan mes den siglo 17 na Corsou. Den Landhuis Rooi Catootje na unda e museo ta situa, por aprecia un parti di e historia mercantil di Corsou y e rol di e Famia Levy Maduro den esaki. Por admira e muebles antiek y mira e obhetonan memorabel cu a forma di e bida di famia Levy Maduro kende su descendientenan tabata comerciantenan importante cu a marca historia y tabata ciudadanonan cu a ocupa puestonan importante den comunidad di Corsou y tambe den e region. Un descendiente en particular, sr. Salomon (Mongui) Abraham Levy Maduro ta esun cu nos tin cu gradici pa a colecta tur informacion di e islanan di Antiyas desde cu e tabata tin 14 aña y



despues cu ela fayece su casa, yiu y nuero a sigui cu e bunita trabou aki di conserva informacion cu ta duna nos awe un bista di kico tur tabata pasa na Corsou, Aruba y e otro islanan rond di nos. Mongui y su famia a percura tambe pa colecciona Judaica, cu ta duna nos un bista di e bida di e comunidad di Huidunan na Corsou y den nos region.

Biblioteca

Na e Biblioteca di Mongui Maduro, Minister Maduro a wordo amablemente yuda pa e directora y historiado sra. Lianne Leonora cu a yuda e mandatario cu mas informacion di su Palo di Famia, Stamboom, di famia Maduro. Archivo Nacional Aruba a compila un parti di e Palo di Famia di e mandatario y na Biblioteca Mongui Maduro e Minister por a haya sa mas di e Maduronan cu a sali for di e Peninsula Iberico pasa via Hulanda, bay Corsou, pa despues un di e rumannan Maduro bay establece na Aruba. Pa Minister Maduro tabata interesante pa haya sa cu su Palo di Famia ta muestra cu e ta e di 13 generacion di Maduro y di 8 generacion di Maduro cu a bin Aruba.

1 Moises (Mosseh) Levy Maduro (Levie) NL

2 Salomon (Salmoä) Levy Maduro Rodriguez NL

3 Mosseh Levy Maduro Cur

4 Samuel Levy Maduro Cur

5 Salomon de Mozes Levy Maduro Cur

6 Moises de Salomon Levy Maduro Aua

7 Samuel de Mozes Levy Maduro

8 Isaac Maduro

9 Simon Sem Maduro

10 Petrus Maduro

11 Simon Maduro

12 Antonio Apolonio (Tommy) Maduro

13 Xiomara Maduro

Gratitud

Minister Maduro ta gradici e staf y personal di Museo Mongui Maduro pa nan tempo, guia y informacion comparti durante e bishita. "Como cu Aruba a forma parti di Antiyas Hulandes y Corsou tabata e centro di maneho di Antiyas Hulandes, hopi informacion di Aruba ta na Corsou. Ta importante pa na Aruba tambe nos por tin acceso na e informacion aki den forma digital. Pa e motibo aki ta importante pa keda explora e avenidananan pa haci esaki posibel. Cu e bishitanan aki nos kier habri caminda pa e dialogo aki por tuma luga." ta palabranan expresa pa Minister Maduro na final di su bishita na Museo y Biblioteca Mongui Maduro.

E FIN DI SIMAN AKI TA E DI CUATER EDICION DI PLAYA FILM FESTIVAL



Fundacion CINEARUBA ta presenta e di cuater edicion di Playa Film Festival cu lo inicia e fin di siman aki. E prome anochi ta diabierna 19 di juli, 8'or di anochi na Cas di Brenchie den Wilhelminastraat, Playa. E programa di diabierna ta consisti di peliculan di arte, peliculan cortico internacional y peliculan di Kingdom of Short cu ta un competencia di peliculan cortico di ficcion for di Aruba, Bonaire, Curaçao, Saba Sint Maarten, Sint Eustatius y Hulanda.

E di dos dia di e festival cu ta diasabra 20 di juli lo inicia cu un tayer di traha pelicula cortico den un minuut y den un solo take. E tayer gratis aki lo wordo duna den e parke di Brenchie Arends for di 6'or di atardi te cu 7'or di anochi.

E anochi di diasabra ta sigui cu mas peliculan for di e segundo parti di e programa di peliculan cortico di arte, internacional y Kingdom of Shorts. Porta ta habri 7:30 di anochi pa tur dos anochi. E publico presente

tin e oportunidad pa vota pa e miho pelicula premio publico.

E festival lo culmina na Santos unda lo bay saca e ganadornan di e miho pelicula internacional y di diferente categorianan di premio pa Kingdom of Shorts cu ta miho pelicula premio hurado y publico,

miho actor, miho actriz, miho director y miho cinematografo.

Fundacion CINEARUBA kier gradici Cede Aruba, VNO, Setar, Santos, Aeropuerto Internacional Reina Beatrix pa haci e evento aki posibel. Pa mas informacion por bishita playafilmfestival.com.



SOLEDAD DEN NOS COMUNIDAD



Shurman C. Milliard-Social Worker Aruba; Mundialmente den sociedadnan grandi y prospero nos ta mira e fenomeno soledad. Den metropolisan manera New York, Tokyo, Paris y Madrid, e cifranan halto di suicidio ta wordo relata na e problema di soledad. Otro sintomanan ta depresion, auto-mutilacion y abuso di droga cu ta hiba na adiccion.

Si nos wak na Aruba mes nos ta wak e crecimiento di soledad den e diferente gruponan di edad. Di hobennan, hobennan adulto, adulto te cu ancianonan ta sufri di soledad ariba nos One Happy Island Aruba. Door di investiga cada grupo di edad nos por mira un liña continuo.

Ta logico cu cada caso no ta mescos y cu cada solucion no tur ora tin e mesun resultado, pero door di analisa esakinan lo por anticipa mihor ariba e posibilidadnan. Hopi sufrimento por wordo supera ora nos sa kiko e posibilidadnan ta y con pa aplica nan. Actuando preventivo, nos por spaar comunidad hopi placa tambe.

Ta importante si pa tene na cuenta cu desaroyonan, sea positivo of negativo, por wordo influencia door di un estado social solamente si tin colaboracion entre tur departamento y fundacionnan. Cada situacion tin un punto di salida y un resultado, y esaki ta encera e terreno social completo. Esaki ta nifica cu ta solamente hunto por busca un solucion.

Na Aruba tin 18937 personanan entre e edad di 5 y 19 aña (fuente CBS 2023). Den e grupo aki tambe tin individuonan cu ta sufri di soledad. Soledad no kiermeen ta fisicamente bo so. E problema ta mas ora tin e sintimento di falta pa forma un relacion emocional cu un otro persona. Falta lasonan emocional.

Como un joven bo ta ocupa cu bo mes, purbando pa forma bo personalidad. Bo celebrato ta den desaroyo cual ta haci cu bo emocionnan no a haya nan lugar ainda. Pa combina esaki cu otro personanan di e mesun edad cu tambe ta pasando den e mesun situacion por ta dificil. E warwaru interno por influencia esaki.

Toch tin mucha cu ta sera amistad mas liher cu otro mucha.

Ora e mucha wordo marca door di profesionalnan, esaki ta desastroso pa e desaroyo emocional di e mucha. E ora ei e mucha ta busca "solucionnan" den su mundo di sentimentonan natural cu ta haci e trayectoria normal dificil. E gevoel di ta "otro" ta bini dilanti. Hobennan por exclui nan mes for di nan ambiente social door di busca nan refugio den e mundo di tecnologia. Internet ta ofrece masha hopi posibilidad pa entretenimiento, cual por tapa soledad pa hopi tempo. Contactonan cu ta wordo estableci via internet ta carese di contacto fisico y mental. E falta di e dos tipo di contacto aki tambe por produci e problema di soledad. Hopi biaha ta pensa cu door cu mucha/hoben ta bay scol cu semper nan ta bin den contacto cu otro persona. Lastimamente e sentimiento di ta bo so den un grupo di hende por ta mas doloroso y dañino pa bo salud emocional cu ta bo so fisicamente. Pa por pertenece na un grupo nan ta cambia e norma y balornan cu nan a ricibi na cas. Nan ta bai asina leu cu nan ta haci cosnan cu ta dañino pa nan salud.

Boulimia y anorexia hopi biaha ta sosode den e edad di "teenager" pero por sigui te den adolescencia. Na momento cu no logra dentro den e grupo di su edad, aunke el a laga su autoestima los, soledad ta haci e daño di mas grandi.

Na Aruba e grupo entre 20 y 75 aña ta consisti di 76302 persona cu ta un grupo grandi cu ta hopi diverso. Un persona di 23 aña ta hopi diferente den su desaroyo emocional cu un persona di 71 aña. Asina

mes ta spera madurez di ambos, cual ta logico den un sociedad prospero. Pero pa un participante den e sociedad esaki ta causa hopi stress door di e tur e responsabilidadnan cu bida ta trece cune. Presion di trabou of expectativanan di bo circulo por haci bo perde curashi.

Personanan den e edadnan aki hopi biaha ta usa salimento of participacion den actividadnan cultural pa sali for di soledad. Esaki por ta hopi positivo si resulta cu e personanan cu bo topa den e salimento tin e mesun interesnan cu bo mes tin. Tambe ta mas facil pa conecta cu otro hende fisicamente of verbalmente durante un baile of ora di come of bebe algo hunto. Pero pa un persona timido e paso aki pa bai e tipo di lugarnan di fiesta asina por ta hopi grandi. Y sali bai na un di e lugarnan aki bo so hopi biaha ta wordo mira manera algo straño.

Na bo lugar di trabou tambe ta un oportunidad pa haci contacto. Akinan al fin y al cabo bo ta topa hende diariamente. Durante e luna y añanan bo por siña conoce e otro hendenan mas miho for di cual relacionan mas personal por crece. Nos ta mira cu relacionan entre colega por ta hopi bunita pero ora un relacion kibra e problema grandi por ta cu diariamente bo lo mester topa e ex-enamorado(a) aki na pia di trabou. Door di esaki dunadornan di trabou ta hopi dudoso di e tipo di relacionnan aki.

E composicion di bo famia of juist e falta di un famia ta trece hopi desapunto den e expectativa di bida. Na Aruba nos ta mira un cifra di divorcio cu ta subi y cifra di matrimonio cu ta baha (fuente CBS 2023). Tambe nos ta mira un aumento den e uso di datingsites cu di diferente manera ta accentua e necesidad di contacto cu otro hende.

No tin un partner no ta nifica cu bo ta desola. Tin personanan cu ta prefera di ta soltero(a) cu den un relacion cu por costa hopi energia, tempo y placa. Den

e caso ei, un grupo di amigonan ta hopi importante. Den nos sociedad nos ta mira cu hende ta biba den un 'bubble'. Esei ta nifica cu nan no ta den contacto cu sociedad completo pero cu un grupo chikito di hende di nan mesun nivel di bida. Esaki ta haci e grupo di contacto for di cual por saca coneccionnan valioso mas chikito y tambe e porcentahe pa logra haya e coneccionnan aki. Dimes e situacion aki ta haci cu e chens pa sinti soledad ta mas grandi.

E cifranan di suicidio ta muestra cu esaki ta sosode mas tanto entre 30 y 50 aña. Hopi biaha ora nos papia di suicidio por link stress cu expectativanan di bida. Mayoria di hende ta spera cu na dado momento nan lo mester conecta cu un partner. Ora nan purba y no logra esaki, e por causa situacionnan di stress den bida.

E grupo di personanan di 75 aña bai ariba ta e grupo cu mas ta experencia soledad den nos comunidad. E posicion di nos grandinan den sociedad a cambia di hefe y protector di conocimiento y cultura pa un posicion di molester of cargo. E respet y aprecio pa cu nos grandinan di 3 generacionnan atras cual tabata wordo celebra na grandi no tei mas. Mas y mas di nos grandinan ta wordo lubida door di famia, poni un banda door di sociedad y wordo negligisha door di e comunidad den cua nan ta biba. Soledad ta un realidad di cua nos no por scapa mas door di situacionnan financiero, físico of mental. Nos ta mira cu aki na Aruba ta keda falta casnan di cuido pa esnan di 75 aña bai ariba. Un di e lugarnan mas grandi pa cuida nos grandinan ta S. A. B. A. Trahadornan ta masha ocupa cu e cuido di e habitantenan. P'esei ta casi imposibel pa nan por tuma tempo pa socialisa cu nan. Ta ser experencia cu famia di e habitantenan masha poco sa bai

CONTINUA PAG 11

SOLEDAD DEN NOS COMUNIDAD

CONTINUACION PAG 10

bishita nan. Naturalmente cu e instituto ta trata na organisa actividadnan cu ta trece e habitantenan den contacto cu otro hende den e instituto mes, pero cada habitante ta keda sinti falta di nan bida di antes y di nan famia y amistadnan. Un parti grandi di e mesun categoria aki ainda ta biba den nan mesun cas sin ayudo professional. Ora ta trata di un pareha, nan dos ta yuda otro. Nan tin nan grupo di amistadnan cu ta bishita otro, nan ta haci diferente actividad manera pinta, cana of atende cu mata cual ta tene nan leu di


soledad. Nan mes ta bishita famia y ta bai cu vakantie. Hopi di nan ta desea di ta disponibel pa cuida y wak pa e nietonan. Pero físicamente nan ta cuminsa bai atras caba. Nan no por cumpli mas cu tur e hobbynan cual ta haci e gruponan di amistad dissolve.

Tambe pa wak pa muchanan cu ta druk no tur ora ta posibel físicamente. Ora cu e energia baha ta difícil pa sali for di cas pa bai keiro of djis pa ta den otro hende. Bishita famia ta costa hopi mas energia y masha lihe ta scohe pa keda cas.

Ademas di esei nos ta mira malesa y/of fayecimento di un di e dos personanan mas

frecuente den e grupo aki. Esey ta trece masha hopi cambio, miedo y tristesa cu ta sentimentonan cu ta isola hende frecuentemente. Hende no kier ta den hende ora nan mortalidad ta asercando.

Tambe nos ta mira depresion manera consecuencia di tur e circunstancianan di bida aki. Un realidad hopi desapuntador den nos comunidad moderno ta ancianonan nan so cu ta wordo lubida den cas. Despues di a cuida nan famia mayoraria parti di nan bida awor nan mes ta wordo forsa pa drenta den soledad y pasa pa olvido. Famianan hopi biaha ta usa como motibo



pa no bai bishita nan grandinan ta ocupa, carrera, expectativanan di bida. Soledad den cada categoria di edad ta un realidad doloroso cu hopi hende ta biba aden.

Tecnología no tur ora ta trece un solucion. E por ta hasta un klechi bou di cual un pustema por crece bira un herida masha habri. Pa

kibra e cadena di soledad den nos comunidad nos lo mester cambia nos manera di pensa y cuminsa biba hunto cu otro y no banda di otro.

Nos mester haci escohencianan consiente pa saca hendenan for di e bahul di olvido y inclui nan den bida. Sino, nos tambe posibelmente lo toca e mesun destino.

PARTICIPA NA HUB CÁMARA SANTO DOMINGO E EXPOSICION DI COMERCIO MULTISECTORAL MAS GRANDI DEN CARIBE

ORANJESTAD – Departamento di Asuntonan Economico, Comercio y Industria ta anuncia cu e registracion pa participa na Hub Cámara Santo Domingo ta habri. Cu interes creciendo den producto for di Republica Dominicana, tin hopi oportunidad pa comerciantenan cu kier haci negoshi cu Republica Dominicana.

Tocante Hub Cámara Santo Domingo

Hub Cámara Santo Domingo ta e exposicion di comercio multisectoral mas grandi den Caribe y e prome desaroya bou di e formato Business to Business (B2B). E evento anual aki ta e espacio ideal pa companianan:

- Expone nan producto y servicionan
- Expande nan liña di negoshi
- Siña tocante tendencianan nobo

- Amplia nan conocimiento via conferencianan riba topiconan di interes general

- Lansa producto nobo riba mercado
- Participa den ronda di negoshi cu comprado local y internacional

Proceso di Registracion
E evento ta dirigi na importado, supermercado, comerciante, distribuidor y esnan cu ta interesa den compra producto of servicio produci na Republica Dominicana.

Pa participa:

- Yena e formulario di registracion cu tur informacion necesario.
- Pasa door di un evaluacion di comprado pa verifica cu ta cumpli cu e perfil rekeri pa e organisadornan.
- Warda comunicacion di desicion for di e organisadornan.

Plataforma Ideal pa Negoshi

Hub Cámara Santo Domingo ta e plataforma ideal pa conecta y concentra cu un variedad di sector formal, tanto nacional como internacional. Compania chikito, mediano y grandi por establece lasonan nobo y contactonan den un ambiente puramente di negoshi (B2B). E ta yuda crea sinergia y complementa e 'value chain' entre participantenan, ta yuda nan siña tocante tendencianan nobo den diferente sector comercial y ta amplia nan frontera pa haña acceso na mercado internacional, entre otro beneficianan.

Detayenan tocante Participacion

Pa comerciantenan cu ta interesa pa asisti na Hub Cámara Santo Domingo, esaki ta tuma lugar di 2-5 di september 2024, enfocando riba sectornan di: Tecnología, Construcción, Energía, Producto Industrial



y Producto Agrícola. Pa participa, mester registra prome cu dia 21 di augustus pa organisadornan por crea un programa atractivo pa bo negoshi. Gobierno Dominicano lo cubri estadia di hotel y transporte local; comerciantenan mester compra solamente un ticket

pa Santo Domingo.

Informacion di Contacto
Pa mas informacion tocante Hub Cámara Santo Domingo, por email Zuleika Quant na z.quant@deaci.aw pa ricibi mas detaye of por click aki pa registra. No perde e oportunidad aki!

Na Sero Janchi dos persona deteni como sospechoso di ladronicia



un satelite dish pero a ser sorprendi pa un familiar cu a core cu nan y a sigui nan te na Sero Janchi na un adres conosi pa polis. Eynan polis a logra haya un di e sospechosonan y a detene y a confisca su pick-up. Un rato despues e patruya a topa cu e otro sospechoso e tal Q cu ta esun cu lo a pidi su amigo di e pick-up pa fabor yude busca e dish. Polis mesora a detene. Ambos a ser hiba pa warda di Shaba pa recherche atende cu nan



Diamars mainta a drenta sigui 2 sospechoso den un informe di cu un persona a pick-up cu lo kier a bay cu

Maravillas de la Fe

Bo ta sufri di un malesa nan cu no no por cura ? Manera artrosis, Alzheimer, demencia, depresión, diabetes osteoporosis, párkinson, insomnio, dolor di barica, weso migren dolo di barica, dolo di wesu, lomba, ect? Bo ta bebe remedi i bo no ta cura? Bo ta victima di bruheria? comunica na MARAVILLAS DE LA FE na 748 56 71

Bo no tin suerte? bo placa no ta jega? Bo ta cumpra number i bo no ta gana? Bo ta bai casino i perde tur bo placa? Invidia, mala suerte? comunika na 748 56 71

Bo tin problema di amor? Bo pareha ta gaña bo? Fracaso, soledat, angustia. comunika na

Comunica na 748 56 71



748 56 71



+ Obituario

Publica serka nos anuncio di fayecimento di bo ser keri. Nos tin 2 pakete pa ofrese;

Pakete 1: Anuncio di fayecimento te dia cu e defunto ser dera

Gradicimento y invitashon pa misa pa 3 dia Afl 250,00

Pakete 2: Anuncio di fayecimento te dia cu e defunto ser dera

Gradicimento y invitashon pa misa pa 3 dia

Na Canal 22 'x prome cu Noticiero 22 Afl 400,00

Pa mas informashon por tuma contacto cu oficina na 585-9500 of na 741-4554

Confirmacion cu loke a pasa Diasabra Dia 13 di Juli anochi no tabata asteriod of satelite Starlink pero un BOLIDE Meteor

Starlink Group 9-3 (Launch 181, 2024-129)									
Site home	Sat ID	SSN	Status	Launch Date	Fail Date	Reentry Date	Orbit	Orbit Zoom	Orbit Plane
Astronautics home	Starlink 11214	S60244	F	2024 Jul 12	2024 Jul 12	2024 Jul 12			
Statistics	Starlink 11202	S60245	F	2024 Jul 12	2024 Jul 12	2024 Jul 12			
Mega satellite constellations	Starlink 11212	S60246	F	2024 Jul 12	2024 Jul 12	2024 Jul 12			
Mega (1000+) constellations list	Starlink 11219	S60247	F	2024 Jul 12	2024 Jul 12	2024 Jul 12			
Individual megaconstellations	Starlink 11216	S60248	F	2024 Jul 12	2024 Jul 12	2024 Jul 12			
Starlink Stats	Starlink 11220	S60249	F	2024 Jul 12	2024 Jul 12	2024 Jul 12			
Height- Inc	Starlink 11218	S60250	F	2024 Jul 12	2024 Jul 12	2024 Jul 12			
Planes	Starlink 11195	S60251	F	2024 Jul 12	2024 Jul 12	2024 Jul 12			
Launch history	Starlink 11211	S60252	F	2024 Jul 12	2024 Jul 12	2024 Jul 12			
Index	Starlink 11215	S60253	F	2024 Jul 12	2024 Jul 12	2024 Jul 12			
OneWeb Stats	Starlink 11217	S60254	F	2024 Jul 12	2024 Jul 12	2024 Jul 12			
Height- Inc	Starlink 11222	S60255	F	2024 Jul 12	2024 Jul 12	2024 Jul 12			
Planes	Starlink 11221	S60256	F	2024 Jul 12	2024 Jul 12	2024 Jul 12			
Launch history	Starlink 32157	S60257	F	2024 Jul 12	2024 Jul 12	2024 Jul 12			
Index	Starlink 32146	S60258	F	2024 Jul 12	2024 Jul 12	2024 Jul 12			
Knipper Stats	Starlink 31832	S60259	F	2024 Jul 12	2024 Jul 12	2024 Jul 12			
Height- Inc	Starlink 31839	S60260	F	2024 Jul 12	2024 Jul 12	2024 Jul 12			
Planes	Starlink 31743	S60261	F	2024 Jul 12	2024 Jul 12	2024 Jul 12			
Launch history	Starlink 31847	S60262	F	2024 Jul 12	2024 Jul 12	2024 Jul 12			
Index	Starlink 31831	S60263	F	2024 Jul 12	2024 Jul 12	2024 Jul 12			
Yinhe Stats									
Height- Inc									
Planes									
Launch history									
Lynk Stats									
Height- Inc									



Pa medio di e comunicado aki Aruba Astro Research Int. kier a informa cu nos a hanja confirmacion cu e 20 satelitenan di Starlink a drenta atmosfera bek y kima esta desintegra den fragmento esta pida pida Diabierna Dia 12 di Juli 2024 y a perde tur e 20 satelitenan cu ta un perdida grandi pa SpaceX confirma



pa nos coleganan di Space. Com y Jonathan McDowell di Harvard University. Nos a ricibi un lista di e 20 satelitenan Starlink cu a drenta atmosfera y disintegra.Tambe nos a ricibi e lista di e dos asteriodnan cu a pasa mas cerca di planeta tera cu ta asteriod 2024 NG y 2024 NB2.Ningun di e dos asteriodnan aki a drenta atmosfera di planeta tera esei ta confirma tambe. Asteriod 2024 NG a pasa na 9 LD lunar Distance 3,459,609 miyon di km di distancia di planeta tera y grandura 18 Diameter(m) y Asteriod 2024 NB2 a pasa un tiki mas leu na 10 LD


Lunar Distance 3,844,01 miyon di km di distancia for di planeta tera y grandura 33 Diameter(m).LD Lunar Distance ta e calculacion di e distancia entre Luna y Planeta Tera.Te cu awor e asteriod cu a pasa mas cerca pa cu luna di Juli esta Diahuebs Dia 11 di Juli 2024 ta Asteriod 2024 NK3 na 0.3 LD Lunar Distance cu ta 115,320,3 mil di km for di nos planeta tera toch basta cerca pero leu di peliger pasando cu seguridad

cu no ta impacta cu atmosfera di nos planeta tera. Un meteor fireball un bola di candela ta diferente cu un entrada di restonan di satelite y otro obhetonan cu ta drenta nos atmosfera y ki ma. Aruba Astro Research Int. haciendo un investigacion mas profundo di e entrada di e meteor fireball ta bin descubri cu e ta un categoria BOLIDE METEOR ta un meteoro excepcionalmente briyante mas briyante cu

magnitude -4 y dos bi-aha mas cla cu luna yen. Pa mas informacion por sigi nos na Aruba Astro Research Int. su facebook na www.facebook.com/arubaastro of por contact nos na centro di observacion ATSOC Aruba Time & Space Observation Center & Aruba Astro Research Int. persona di contacto Marcos Bislip na tel: 5629407 of email na arubaastroresearch@gmail.com

Diasabra Dia 13 di Juli 2024 evento celestial strea Spica y Luna observa for di nos region serca di otro

Aruba Astro Research Int. pa medio di e comunicado aki kier informa cu Diasabra Dia 13 di Juli 2024 anochi a tuma lugar e evento celestial na unda for di nos region Norte America, Centro America, Sur America y Caribe por a mira strea Spica y Luna bandi di otro masha bunita mes.Na Aruba despues cu tur hende a experiencia e entrada di e meteor fireball Bolide por a sigi e evento celestial y astronomico di strea Spica y Luna observa for di nos region perfetamente.



Parlamentario Alvin Molina (MEP):

Inverti den deporte escolar sigur ta un bon manera pa promove siguridad na Aruba



Dos siman di competencia escolar a culmina na Joe Laveist Sport Park San Nicolas, unda cu 1300 alumno di 45 scol preparatorio, basico y secundario di Aruba a competi contra otro den Weganan Escolar 2024. E mucha- y hobennan cu ta practica deporte ta siña disciplina, traha den ekipo y inverti den nan salud y nan futuro. E hobennan cu ta practica deporte tin menos tempo y menos interes pa haci cos malo y/of comete actonan



penal. Deporte sigur ta un bon manera pa motiva e muchanan pa construi un futuro positivo y ta yuda preveni pa nan bai den mal caminda. Mi ta aplaudi y sostene proyectonan deportivo, paso mi ta kere firmemente cu inversion den deporte ta inverti den siguridad di nos pais. Mi ta felicita Minister Endy Croes, Ministerio di Enseñansa y Deporte, IBISA y tur stakeholder pa haci e proyecto aki posibel


pa e hobennan. Pabien na e alumno- y scolnan cu a participa.

Clasificados




SOLODIPUEBLO@GMAIL.COM
CEL.585 9500





Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado : Sorteo 17 July 2024 Merdia

CATOCIL Sorteo # 4329 6691 2357 5680 MULTI-X X2 BIG 4 Sorteo # 4329 7712 MULTI-X X2 10FF Sorteo # 2385 9852 ZODIAC Sorteo # 4329 9991 Piscis LUCKY 3 Sorteo # 1203 217 MULTI-X X2	LOTTO 5 Sorteo # 0 x Jackpot 0 x Match 4+ 0 x Match 4 0 x Afl. 12,00 Joker Letter Proximo Jackpot 100.000,-	LOTTO DIA Sorteo # 0 x Jackpot 0 x Match 4 0 x Afl. 8,00 Proximo Jackpot 52.000,-	MEGA Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00 Mega Ball Proximo Jackpot 370.000,- Afl. 500.000,-	KORSOU Sorteo # 
---	---	--	---	--

FORTALEZA PA FAMILIA

Scirbi pa Pastor Marcel Balootje.

REBELDIA TA STROBA E PROPOSITO DI DIOS DEN NOS BIDA

E proposito di Dios den nos bida, ta pa nos glorifica Dios cu nos bida.

Ora rebeldia y inmoralidad presenta nos tin cu comprende cu e forma di bida ey no ta boluntad di Dios, tampoco e ta agrada Dios.



Pa nos haña a e proposito di Dios pa nos bida, nos tin cu busca Dios den nos oracion, y Dios lo revela Su mes na nos su perfecto boluntad pa nos.

Ta pesey ta para scirbi den Romanos 12:2 : Y no sea conforme e mundo aki, ma sea transforma pa medio di e renobamento di boso mente, pa boso por comproba kico ta e bon y agradabel y perfecto boluntad di Dios.

Palabra di Dios ta bisa nos den Salmo 37:4: Deleita bo mes den Señor y e lo duna bo e deseonan di bo curason. Ora nos ta kier deleita nos mes den Señor ningun clase di rebeldia, arrogancia y orguyo por ta presente den nos bida.

Proverbionan 17:11 Ta para scirbi: Un hende rebelde ta busca solamente maldad, pesey un mensahero cruel lo wordo manda contra dje.

Isaias 1:19-20 ta para scirbi: Si boso ta dispuesto y ta obedece, boso lo come e mihor di e tera. Ma si boso nenga y rebeldia, spada lo debora boso. Di berdad e boca di Señor a papia.

Salmo 68:6 ta para scirbi: Dios ta provee un cas pa e solitario. E ta saca e presonan y guanan na prosperidad, ma e rebeldenan ta hiba na un tera seco-seco.

Ay di e yuinan rebelde Señor ta declara, kendenan ta ehecuta un plan cu no ta di Mi, y cu ta sera alianza cu no ta di Mi Spirito, pa montona pica riba pica. (Isaias 30:1).

Den e sombra y scuridad di mundo no tin refugio pa e yuinan di Dios, pesey nos no por kere den promesa di hende, pero nos mester kere den e palabra di Dios cu ta eterno, pasobra eyden tin bida, tanto awor

como bida eterna.

Maske cuanto cos mundo por ofrece, nos salvacion y nos integridad ta bini na prome lugar.

Ta dificil pa un creyente por haci manera Esau, kende a bende su primogenitura pa un plato di cuminda, y despues ni cu lagrima no por a hanje bek.

Ta dificil pa hende cu ta creyente rechasa Dios door di comete adulterio y cay den perversidad profundo.

E prioridad di Dios den nos bida ta nifica tur cos pa nos bida y no ta cos di gamble cune, pasobra sin nos sa e enemigo ta pone nos den enemistad cu Dios, Samson a haci wega cu pica, y ora e tabata kier a lanta pensando cu e Spirito di Dios tabata cune, a resulta cu e Spirito di Dios a bandone.

Rebeldia, mentira y inmoralidad ta pone cu e Spirito Santo di Dios, ta aleha for di nos, paso e Spirito Santo di Dios no ta obra den rebeldia.

Ta tempo pa hende para un rato keto, y rasona kico ta mas importante pa nos bida, salvacion, integridad, respet, moral y etica of inmoralidad y perversidad?

Pasobra rebeldia ta manera e pica di bruheria, y capricho ta manera inikidad y idolatria. Pasobra bo a rechasa e palabra di Señor E tambe a rechasa bo como rey. (1 Samuel 15:23).

Romanonan 2:5 ta bisa lo siguiente: Ma pa motibo di bo capricho y bo curason cu no ta repentí, bo ta montona furia pa bo mes, den e dia di furia y revelacion di e huicio husto di Dios.

Dios tene Misericordia y Compasion.

Sinceramente, Pastor Marcel Balootje.



PAY AS YOU CAN

Piedraplat ☎ 582 0000
Sanicolaas ☎ 584 8888 | 5820000
Habri dialuna pa diabierna | 8:00am-4:00pm

Olive Tree Social Department ☎ (+297) 743 7411
www.olivetreefuneralhome.com

ORACION DI DIA



Feliz dia bendiciona y cu Dios su man santo ta riba cada un di nos

Den e tempo ey Hesus a bisa: "Tata, Señor di shelo y di tera! Mi ta gradici Bo cu Bo a duna esnan simpel conocimiento di e cosnan cu Bo a sconde pa esnan sabi y inteligente." Mateo 11,25

Ta trata di e reino cu Dios mes a funda y esnan simpel na kende e cosnan aki a keda revela. Hesus ta expresa na un manera indirecto cu E tin un caso unico cu Dios su Tata, p'esey nos ta proclama Dios su sabiduria secreto prome cu mundo a cuminsa. El a traha e plan pa nos tuma parti na su gloria pero e plan ey a keda scondi; ningun di e podernan cu ta domina e mundo aki no tabatin conocimiento di e plan ey.

Si nan tabata conoc'E nan lo no a crucifica nos Señor di gloria. Pero manera Santa Escritura ta bisa: loke ningun hende no a yega di mira, ni ningun hende no a yega di tende, pues ni ningun hende no por imagina nan, esey Dios a prepara pa esnan cu ta stim'E. Ma nos si Dios a laga conoce su plan secreto pa medio di su Spirito Santo. (1 Cor. 2, 7-10)

Dios a laga nos conoce su proposito scondi di acuerdo cu su boluntad, e proposito cu El a dicidi di antemano pa realisa pa medio di Cristo.

Oracion: Dios bondadoso, Abo cu ta scrudiña curasonnan, yuda nos lucha cu nos cruz cu no ta facil, pero cu Cristo nos por tur cos. E so por duna nos e forza sobrenatural pa enfrenta e lucha aki na tera. Amen.

RECORDATORIO PA YEGA NA REMARKE PA TARIFA SPECIAL DI AWA PA CUNUKERO

Departamento di Agricultura, cria y Pesca, Santa Rosa como un departamentu responsabel ta desea di recorda tur persona cu ta desea di ta un Agricultor responsable, serio cu kier practica esaki y kier yega na remarke pa haya e tarifa special for di WEB Aruba NV hunto cu nos departamento mester tene na cuenta cu e rekesitonan aki. Nos ta hasi esaki pa motibo nos ta sigui haya peticion y pregunta pa e tarifa special di awa pa Agricultura di AWG 5,50,-

Puntonan cu mester tene na cuenta
Tur Cunukero y Criado registra na Santa Rosa y cu ta registra na Camara di Comercio (KVK), lo por aplica pa haya awa produci na un prijs fiho di Awg 5,50 pa m3 (meter cubico), cu un compra minimo garantisada di dies (10) m3.

Pa por tin un miho control y estructura, Santa Rosa a establece un lista di rekerimento cu e Cunukero lo mester cumpli cun'e pa ricibi e prijs reduci, cual ta ensera entre otro;

E cliente mester tin un parcela di tereno cu un superficie di por lo menos 400 m² cu ta totalmente destina pa agricultura, horticultura y cria di bestia. Esaki mester ta registra como propiedad di Pais Aruba y destina pa Agricultura/Criansa di bestia of cu ta su propiedad y ta realiza un actividad agricola riba esaki, cual ta registra tambe na Camara di Comercio.

E cliente mester tin un minimo permanente di 400 m² di parcela pa uso di agricultura, horticultura y cria di bestia. E agricultura y horticultura no ta inclui explicitamente e floricultura of cultivo di mata di decoracion of cultivo di

cannabis;
E awa suministra via un meter agricola tin di wordo usa pa fin di Agricultura y Horticultura comercial, temporalmente mediante un sistema di irigacion via gota cu tuberianan di distribucion cu su valve y slangnan di awa conecta pa muha e matanan. E cliente ta responsabel pa instalacion y funcionamiento di esaki y otro instalacionnan rekeri.

E cliente ta obliga pa uza e awa di e meter agricola exclusivamente pa su propio parcela y unicamente pa actividad di agricultura, horticultura y cria di bestia. Ta keda prohibi pa uza e awa pa for di e tereno pa cualkier motibo, ni door di e interesado ni pa otronan.

Den caso di uzo di un tanki intermedio (buffer tank), e tanki mester tin un bon ruta di acceso pa e sistema di suministro di awa via e meter di awa pa agricultura pa e parti mas ariba di e tanki, na unda ta almacena e awa cu e coneccionnan necesario pa un bon ruta di acceso. E sistema di suministro di awa mester tin un sistema di transito hermetico sin ningun lik.

Ta for di aña 2021 a bira mandatorio pa e Agricultor y Criado sigui anualmente un "Programa di Certificacion di Calidad" conoci como GAP (Bon Practica pa Agricultura) y permiti inspectornan autorisa di Santa Rosa (DLVV), Departamento di Higiene (DVG) y/of WEB Aruba NV tin acceso na su instalacionnan pa controla higiene, registro di informacion di produccion of pa tuma muestranan di awa.

E cliente mester ta registra na DLVV/Departamento di Agricultura, Cria y Pesca,

Santa Rosa. Na momento cu registra como Agricultor of Criado e persona mester presenta copia di su contract di huur di tereno of titulo di propiedad hunto cu un identificacion valido y firma un, hunto cu un declaracion di cooperacion cu DLVV tocante presentacion di informacion y cifranan di produccion mensual di su proyecto di Agricultura, Horticultura of Cria di Bestia.

Pronto lo bai tuma contacto cu esnan cu ya caba ta registra aki na Santa Rosa pa un carnet oficial cu ta bay sirbi como prueba di registro na DLVV. Riba e carnet aki lo aparece bo potret y bo informacionnan.

Santa Rosa, lo mester ricibi mensualmente cada 15 di luna un "Informe di produccion" di e cliente.

Den caso cu departamento concerni cu infraestructura retira un tereno di huur for di un persona cu no ta practica agricultura of criansa di bestia, e cliente ta rekeri pa informa DLVV di esaki di inmediato, cual ta haci cu e cliente no lo tin derecho mas pa e tarifa special pa Agricultura of Cria di Bestia. Tambe den den caso cu tin un cambio di tereno, DLVV y WEB Aruba NV tin cu ricibi notificacion via di un carta of e-mail na info@santarosa.aw.

Si un cliente no cumpli of no cumpli suficientemente cu un of mas di e reglanan arriba menciona, e no ta yega na remarke pa aplica pa e tarifa special pa Agricultura, Horticultura of Cria di Bestia y e acuerdo ta keda termina pa Pais Aruba. (Departamento di Agricultura, Cria y Pesca, Santa Rosa (DLVV) lo notifica WEB Aruba NV inmediatamente di e terminacion di e acuerdo aki.



Pa mas informacion por tuma contacto cu Departamento di Agricultura, Cria y Pesca (Santa Rosa) via tel; 585-8102 of via info@santarosa.aw.



8								
		3	6					
	7			9		2		
	5				7			
				4	5	7		
			1				3	
		1					6	8
		8	5				1	
	9					4		

		8		3		5	4	
3			4		7	9		
4	1				8			2
	4	3	5		2		6	
5								8
	6		3		9	4	1	
1			8				2	7
		5	6		3			4
	2	9		7		8		